



Namminersornerullutik Oqartussani, Kommuninilu nunatsinni tjenestemandit pillugit Inatsisartut Inatsisaata § 55-ip imm.1-ip allanngortinneqarnissaanut tunngasumik nalunaarusioqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut nunatsinni tjenestemandit, danskit naalagaaffiata nunatsinni tjenestemandinut malittarisassai malillugit tjenestemandisut soraarnerussutisiaqalersinnaaleqqullugit, taamaattorli tapeqartitsisoqassalluni soraarnerussutisiaqaataasussanit aningaasarsianinngaaniit %-mik aaliangersimasumik angissusilikkamik, taamaaliornikkut nunatsinni, qallunaat nunaannilu tjenestemandit soraarnerussutisiaqarnikkut assigiinngissutaasup nalimmassarneqarnissaa anguniarneqassalluni. Naligiinngissutaasoq nalimmassararlugu, tapeqaataasussap qanoq annertutiginissaa aammalu kommuninut, namminersorlutillu oqartussanut qanoq aningaasatigut naleqassanersoq nalunaarusiami UKA25 sioqqullugu tunniunneqartussami ersarissarneqassaaq. Tamatumuungattaaq ilanngullugu nunatsinni qassit, tjenestemandinut isumaqatigiissut naapertorlugu atorfinitsinneqarsimanersut nalunaarusiami ersarissarneqassaaq.

(Unatsisartunut ilaasortaq, Peter Olsen, Inuit Ataqtigiit)
(Siullermeerneqarnera)

Qujanaq siunnersuuteqartumut uuminnga pingaaruteqartumik siunnersuuteqarneranut, qineqqusaarnernut atasmik oqallisaasaqisumut, taamaattorli suli amerlasuuni ajornartorsiutaasumut Kalaallit Nunaanni tjenestemandit soraarnerussutisiaqartunut.

Sivisoorsuarmik sulisimanerup kingorna naleqqulluinnarpoq, utoqqartatta toqqissisimasumik isumannaatsumillu soraarnerussutisiaqartunut taassumalu kingorna imminnut aammalu qanigisaminnut pitsaanerpaamik inuuneqarnissamik qulakkeerinnippata.

Utoqqaat pingaarutilinnik ileqqunik misilittakkanillu pigisaqarput ingerlateqqittakkaminnik, taakkulu kulturikkut kingornutatsinnut pisuunnguallaataasarput inuiaqatigiinnilu ataqtigiinnermik pilersitsisarlutik. Utoqqaat ilisimassutsimik, nikallujaassusermik inuunermillu paasinnilluarsimanermik neqerooruteqarsinnaapput, inuiaqatigiinni anersaakkut ileqqorissaarnermullu pingaartitanik nukittorsaataallutik. Kinguaariaat akornanni isumassuinerup nammaqatigiinnerullu ukkatarinerulerneratigut inuusuttut utoqqaallu isumassoqatigiinnerannik ataqtigiinnerulerneranillu kinguneqassaaq, inuttut ataqtigiissutsimik annertusaataasumik. Innuttaasut utoqqaat atuisunut ilaapput, kajumissutsiminnik suliaqarnermikkut ilaatigullu sulinerikkut suliffinni nalinginnaalluinnartuni. Aningaasaqarniarneq tapersersinnaavaat ileqqarnermikkut aningaasaliinermikkullu aammalu pisortat kiffartuussinerat oqinnerulersillugu kajumissutsiminnik sulinerminnut isumassuinnikkullu, suli inuiaqatigiinni pingaaruteqartutut misigisinnaallutik.



Demokraatit kissaatigaat, sapinngisatsinnik utoqqartagut tapersersussagigut, isumaqarpugullu, pissusissamisoorluinnartoq, tjestemandinut soraarnerussutisiat Naalagaaffeqatigiinnerup iluani tamakkiisumik assigiilernissaat.

Ajoraluartumik akuttunngitsumik takusarparput, periarfissat assigiinnginnerat, Naalagaaffeqatigiinnermi sumi najugaqarneq apeqqutaatinneqarluni. Assigiinngisitsinerit taakku naapertuilluarnerup aqqani iliuuseqarfigisariaqarpagut.

Taamaattumik nalunaarusiornissamik kissaateqarneq una taperserparput siunnersuutillu ataatsimiitaliami susassaqartumi suliarineqarnissaa innersuussutigalugu.